

[Augsburg], 17. März 1557

An Johannes Oporinus

UB Basel, Fr. Gr. I 11, fol. 208r-v.
 Steinmann Nr. 700.
 Lit.: Husner S. 150-152 (mit Auszug).

S. P. D. Cum mercaturam facere mihi nec libuerit, nec necesse fuerit, mitto per Georgium Willerum Choniaten, vsque ad obitum Andronici. Restant terniones a puero meo adhuc describendi circiter 36, vt existimo, cum praefatione, reliquiis indicis, et annotationibus. Nunc tuum erit, cum primo tabellario ad nos scribere

1. Vtrum graecè latineqüe vt Zonaram, ad nondinas autumnales excudere velis nec ne? an aliam rationem commodiorem censeas?

2. Quid tibi a D. Antonio praestari velis pro eo quod non tuo arbitratu excudes.

Haec significato quamprimum, ne editio differatur. Sin hoc opus tibi cordi non erit: pro fide tua, sartum tectum, vt bono viro dignum est, ad me remittes statim.

Zonaram a te absolutum esse puto. 24 exempla D. Antonio promisisti. Ego, si te πολυχρήματον esse scirem, aequam pecuniolam mallem, quam multos libros, quorum vectura mihi pluris ferè constat, quam quanti est remuneratio eorum quibus donantur. et tamen donare cogor ijs etiam, qui mihi gratias non agunt, et nisi donarem irascerentur. Nunc cum sciam te libros facilius dare posse quam pecuniam: hoc tantum a te peto, vt tot exempla Zonarae mihi mittas, quot sine dispendio tuo et molestia potes. neque insidiosam e<sse> putas liberalitatem meam. quicquid miseris, <etia>msi parum miseris, non tantum aequo, sed etiam grato animo accipiam. Cupio tamen praeter aliquot exempla Zonarae, Anatomiam Vesalij a te excusam, si adhuc in officina tua extat, et ex ijs libris, quos intra biennium excudisti, quos meis studijs aptos esse putaris. Commentarios theologicos, id est Cramben (ne quid grauius dicam) μυριάκις repetitam non curo. nec magni facio poemata nisi insignia. grammatica (nisi puerilia sunt) historica et philosophica desidero, non tam quod nunc mihi vsui esse possint, quam quod praeuidere videor, (sed fieri potest vt fallar) ea vsui mihi aliquando futura, si vixero. Dominus admoneri te iussit de pensionibus nondum solutis. Non dubito quin facturus sis, quod possis, idqüe mea quoque causa, quo intercessore in impetranda mutua pecunia vsus es. Libros quos huc missurus es rogo vt in peculiare vasculum compingendos cures, et ad D. Anto[nium] Fuggerum perferendos. Vale et quamprimum huc scribe quae tua sit de Choniate sententia. 17 Martij Anno 1557. Choniatae versionem absolui 14 die Februarij. Puer meus me remoratur. Spero tamen eum et graeca et latina absoluturum, vt a me correcta intra mensem, aut 6 septimanas ad summum omnia ad te mitti possint. Quare si se tibi priori obtulerit occasio tabellarij, caue negligas. Iterum vale.

Hiero[nymus] Wolfius
 Tuus.